

Promer disenjo estatua di Henny Eman ta cla



Aki riba nos ta mira e disenjo cu senjor Padu Lampe a traha di e estatua di Henny Eman, cual segun e plannan di A.V.P., lo bin den e centro di un rotonde na Oranjestad.

ORANJESTAD, 29 april. — E promer disenjo den miniatura di e estatua di e difunto politico Arubano Henny Eman, a bin cla, segun e declaracion di e escultor di Den Haag A. de Kruijff. E lo manda e miniatura aki pa e directiva di e Institucion Henny Eman, cu lo tin di duna su acuerdo promer cu e escultor lo por sigui cu e proximo etapa di e trabao. Entretanto senjor J.C. (Padu) Lampe a traha un pintura di e estatua, segun e gusto di e directiva di e institucion manera mas o menos lo e mester ta. Ta worde spera cu senjor De Kruijff lo traha e estatua den e mes un sentido.

Algo henteramente nobo den e trahamento di e estatua aki ta, segun e ultimo plannan, cu e escultor lo bin traha e estatua aki na Aruba mes. Manera cu ta conoci e estatua aki lo tin un haltura di mas o menos siete pia y construi completamente for di piedra Arubano, diorita. A resulta cu ta mucho mas barata pa laga e escultor bin Aruba pa escoge e piedra y traha e estatua aki mes, na lugar di transporta e enorme pida piedra pa Hulanda, traha e estatua ayanan y despues transporte pa Aruba atrobe.

Y e construccion na Aruba ta elimina e chens cu e estatua por hanja algun danjo durante transportacion, mientras si mala suerte acompaña e escultor durante su trabao, akíman inmediatamente e ta hanja otro piedra, mientras cu si esaki pasa na Hulanda, e ora mester bolbe mandele un otro enorme pida piedra. E directiva di e Institucion di Henny Eman, cu a worde forma dia 2 di april 1958, na e momento ta consisti di president Max Croes, vice-president John (Twai) Croes, secretario Adolf G. Leo, segundo secretario Jose Flanegin y tesorero Hilario van der Biest. E plan ta pa e estatua worde poni den e centro di un rotonde. Ta worde pensa pa pone na e rotonde, cu ta mita finaliza, na cuminzamento di e boulevard pa Malmok, cerca di e oficina di DOW. Ta senjor Leo kende algun lunanan pasa durante di un estadia cortico na Hulanda, a topa cu e escultor, kende actualmente ta construyendo e estatua di difunto Henny Eman.